



**Tunup namminerisamik kommuuinngorsinnaanerata nalilernissaa pillugu apeqquteqaat aallaavigalugu oqallisissiaq.**

(Inatsisartunut ilaasortaq Lars Poulsen, Siumut)

Qujanaq Inatsisartunut ilaasortamut Lars Poulsen-imut apeqquteqaat aallaavigalugu oqallisissiamik soqutigintumik saqqummiussineranut.

Siullermiilingilaq, kommunit kattussuunneqarnerannut atatillugu ajornartorsiutinik saqqummiussisoqarnera. Taamaammat tupaallannangilaq, uagut politikikkut tikkuartuaratsigu, innuttaasut qanimut tamat oqartussaaqataanerata ajorseriarneranik nalaataqartarnerat. Taamaattorli oqartariaqarpunga, uagut politikkeritut akisussaafferujussuarmik tigummiaraqaratta qanimut tamat oqartussaaqataanerata siuarsarnissaanut ammasuunikkut, ersarissuliornikkut, minnerunngitsumillu tusarnaarsinnaanikkut, innuttaasutsinnut sullissisussaalluta maaniikkatta. Taamaammat qanimut tamat oqartussaaqataanerata tigussaassumillu akisussaasuseqarneq oqallisigissatillugu, assigiinngitsunik sammiveqartunik oqallittarpugut, isummammi assigiinngitsut amerlasuut saqqummertamata.

Naalackersuisut akissuteqaatiminni allapput, pingaartumik isumaginninneq eqqorneqassasoq, Kommuneqarfik Sermersooq kangiuanut kitaanullu avinneqassagaluarpat, sulisut sulinerminni ataatsimoorussamik piginnaasaasa katersuuffeqarnissaat annikillissammata. Siunnersuuteqartullumi oqallisissiamini allappaa, ilinniarsimassuseq kinguaattooqqasoq suliassaqaarfimmilu aningaasaliinissaq pisariaqartoq. Isumaqaarpunga, uani Inatsisartut ataatsimiineranni suliniutinik pitsaasunik arlalinnik akuersimasugut piffimmi ilinniarnissamut- pikkorissarnissamullu periarfissat qulakkeerumallugit, tassani isumaginninnermut- peqqinnissaqaarnermullu ingerlatani Demokraatit siunnersuutigisaat piffinni tarnikkut ikiueqqaarnermut innuttaasunut aallaaveqartumik pikkorissaanerit ingerlanneqartalernissaat aammalu misiluitaasumik suliniut isumaginninnermut- peqqinnissaqaarnermullu suliffissaaleqisunut ingerlanneqartussat akuerineqarnissaat naatsorsuutaalermat imaasilluni, ilisimasat- piginnaasallu ineriartortinnissaat siunertarlugu, siunissami ajornartorsiutinik aaqqiissutissaasinnaasoq, soorlu uani Naalackersuisunit taakkartorneqartut.

Partii Atassutip Inatsisartut ataatsimiineranni uani kommunit katiterneqarnerisa nalilersorneqarnissaannik siunnersuuteqarpoq. Tassunga immikkoortumut isumaliuutissiissutip ersarissumik ersersippai avitsinermi allaffissornikkut aningaasatigullu kingunissai. Atassutip tunngavilersuutit ajornartorsiutillu asseqqinnaangajai saqqummiuppai, siunnersuuteqartup uani ersarissagai.

Uanga nammineq Kujataani Narsaminngaaneerpunga. 80-ikkunni 90-ikkullu aallartinneranni peroriartorninni illoqarfiup ineriartornera misigaara, innuttaasut sulisut, innuttaasut ilinniarsimallutillu eqeersimaartut, illoqarfiup ineriartorneranut akisussaqaataasut kiisalu meeqqat inuusuttullu soqutigisaannut soqutiginnittut. Ullumikkut illoqarfimmut tikeraaraangama pissutsit allarluinnaapput.



Illoqarfinnut annernut nutsernerit kinguneraat suliffippassuit sulisullu ilinniarluarsimasut illoqarfik qimassimammassuk. Kommunit kattussuunneranni kingunerinut innuttaasut misigisaat tusartarpakka, tamatigungajallu illoqarfiit annerit, aningaasatigut tullerriaarinernut pitsaanngitsunillu aalajangiinernut pisuutitaasarput. Taamaattumik Tunumiinnaq taamaallaat pinngillat, “qanimut tamat oqartussaaqataanerannik ajornartorsiutit” ineriartortitsinnginnerit ineriartortitsinissamullu pilersaarutit.

Tassunga atatillugu kommunit kattussuunneqarnerannut nalilersuinissamut immikkoortumut tunngasumut Demokraatit erseqqissarpaat nalilersuinermit innuttaasut isumaasa tusaaneqarnissaat pisariaqartuusoq, imaangitsoq allaffissornikkut ingerlatsinikkullu isiginiarneqaannassasoq, soorlu 2015-imi ilusilersuinermit aqqissuusseqqinissami kingunissallu pillugit misissuinerup ersersikkai.

Pisariaqarpoq takutissallugu, innuttaasut tamarmik naleqartut aammalu tamarmik peqataatinneqartut akisussaaqataasullu piffiup ingerlalluarnissaanik ineriartortitseqataallutik. Nunatsinni angalasarninni nunaqarfippassuit ingerlalluurtut takusarpakka, pingaartumik nunatta avannaani, piffinnilu allani. Aalisartut, piniartut savaatillillu eqeersimaartut sulerusussusillillu, tamarmik kiffaanngisuseqarnerulernissamik allaffissornikillisaanissamillu kissaateqartut, taamaalillutik nammineq illuliorsinnaangorlutik illuutinut maskiinanullu nutaanut aningaasaatik atorsinnaalerlugit suliatic annertusarumallugit, kiisalu kinguaariit tulliinut inuussutissarsiutimik inerisaaqqinnissaannut periarfissikkumallugit. Taamaammatt isumaqarpunga neriunarlunilu piumassuseqartoqartoq aammalu piffissanngortoq piffinni innuttaasut oqaloqatiginissaannut siunissami illoqarfisik nunaqarfitsilluunniit qanoq ittuussanersut kissaatigineraat tusarumallugu.

Taamatuttaq neriunaateqarpoq, assersuutigalugu Kommune Qeqertallip illoqarfiini erngup nukinganik nukissiuutiliorfissat nutaat pilersinneqarpata aammalu, siunissami Tasiilami mittarfiliortoqarpat, takornariaqarnerup ineriartornera annertunerusumik ukkatarineqassammat nutaanik inuussutissarsiutinut periarfissanik pilersitsinikkut. Takornariaqarneq Demokraatit pingaartitaraat, aalajangigassatullu siunnersuuteqarsimalluta, nunatsinni suliffissanik pilersitsiumalluta piffinni pigiliussinissaq siunertaralugu. Mittarfissarsuit nutaat naammassingajalerput, pisariaqarluinnarporlu piffinni innuttaasut inuussutissarsiutinut nutaanut ineriartortitsinermut akisussaaqataanissaat uani aamma pingaartuuvoq qitiusumit, Inatsisartunit Naalakkersuisuniillu inuussutissarsiutinut nutaanut pilersitassanut sinaakkusersuinissarput.

Illoqarfinnut anginernut nutsernerup ilaatigut kingunerivai inissaaleqinerujussuaq, ingammik illoqarfinnut nuuffigineqartunut. Akit qaffakkaluttuinnartut, allaat ilinniarsimasuugaluarluni akilerniarnissaat ajornakusoortut. Angerlarsimaffeqanngitsut amerliartornerat pisortat ingerlatsivii angivallaartut aammalu qitiusumik ingerlatsinerup, illoqarfinni mikinerusuni nunaqarfinnilu suliffeqarfiit siumukarnissaraluannik inissaqartitsinanilu periarfissiinngitsoq. Kingullertut taasara ineriartornermut kiffaanngisuseqarnerulernermullu aqqutissaasinnaagaluarpoq, taamaattumillu Demokraatit isumaqarput allaffissornikillisaaneq namminersortunngorsaanerlu innuttaasut akisussaaqataanerannut piffimmilu iluaqutaasussamik inuttut- suliffeqarfittullu ineriartornissamut piginneqataasutut aqqutissiuunneqarnissaannut periarfissinneqassasoq. Akisussaaffik kiffaanngissuserlu innuttaasunut uterteqqittariaqarparput.



UKA2022/93 isumaliuutissiisummi apeqqtinik pissanganartunik saqqummiisoqarpoq, innuttaasut tusarneqarnissaannik qularnaarisoqarsinnaasoq uagullu innuttaasut piffimmini allannguerusunnerannik kissaateqarnerat piviusunngortissinnaallugu. Taamaammatt politikikkut Naalakkersuisut ilumoorput, Kommuneqarfik Sermersuup avinneqarnissaanik kissaat innuttaasut kissaateqarneranik aallaaviussasoq tamat oqartussaaqataaneratt ersarissumillu tunngaveqarneq aallaavigalugit.